

Date – 04/04/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Synod Officer's Meeting chuan Kohhran member retheihna avanga Mizoram Universal Health Care Scheme zawm theilo ten an zawm ve theih nana hma la turin Kohhran hrang hrang a hriattir.
2. West Asia indona thleng mek avanga ei rawngbawlna gas (LPG) leh tuialhthei a harsatna thleng thei lakah Mizoram Sawrkar chuan ngawrh takin hma a la reng an ti.
3. Assam, Puducherry, Keralam, Tamil Nadu leh West Bengal Assembly inthlan campaign in a vanglai a thleng chho mek.
4. Indian Oil chaun ramchhungah LPG supply tluang takin intinah kalpui mek a ni a ti.



MUHCS

Synod Officer's Meeting chuan Kohhran member retheihna avanga Mizoram Universal Health Care Scheme zawm theilo ten an zawm ve theih nana hma la turin Kohhran hrang hrang a hriattir.

Synod Officer's Meeting chuan Kohhran ho ah Kohhran member te retheihna avanga zawm thei lo, harsa zual te Kohhranin an zawm theih nana hma la tura siam ni se an ti a, mi harsa zawk te tanpuina kawng anih avangin Kohhran hrang hrang ten ti hlawhtling ngei turin an ngen a ni.

Pentecostal Church (UPC) of Mizoram chuan an zir chian hnuah Mizoram Universal Health Care Scheme (MUHCS) chu zawm ve ngei tula an hriat avangin an kohhran hnuah thawk zawng zawngte chu zawm vek turin a hriattir a.

UPC (Mizoram) chuan thuchhuah siamin Mizoram khua leh tui nih loh vang emaw, thil dang Planning & Finance Board-in chhuanlam tlinga a pawmte avanga zawm thei lo tih loh mi dang zawng chuan an zawm ngei tur a ni an ti a. Mahni thu a MUHCS zawm lo te chu kohhranin MR Bill a buaipui sak tawh dawn lo a, Khua leh tui nihna avang emaw he ruahmanna-in a phut document neih loh vanga zawm thei lo te chu a huam dawn lo a, dan pangngai-in kohhranah MR an la bill chhunzawm zel thei dawn a ni.



BORDER TRADE

Parliament budget session neih mek ah Ningani khan Rajya Sabha MP Pu K. Vanlalvena chuan Bangladesh nena insumdawn tawna tura kum sawm kal ta a inremna siam tawh tun thlenga hma lakna awm mumal lo leh Kawrpui lei dawh thuai a tul thu a sawi chhuak.

Akashvani News a hrilh danin Pu K. Vanlavena hian Rajya Sabha a hun laklawh (Zero Hour) hmang tangkai-in Union Home Ministry bul tuma Khawthlang Tuipui chungah cheng vaibelchhe 54 senna tur lei (bridge) dawh tan a ni ta chu lawmawm a tih thu a sawi a. Kum 2021-ah Bangladesh ramri hrula BSF camp engemawzat a tlawh thute, BSF camp thenkhat chu eng kawng mahin a pawh loh thu leh henglai hmuna damlo te pawh inkalpawhna kawng a awm loh avanga an boral phah thu te BSF hotute leh khawthlang hotu ten a hnena an lo thlen thu te a sawi chhuak a. He harsatna sutkian a nih theih na'n hian Union Home Ministry-ah Khawthlang Tuipui chungah lei dawh tura ngenna a thlen thu leh a ngenna ngai pawimawha Khawthlang Tuipui lei dawh tan a nih tak avanga Union Home Minister Pu Amit Shah chungah a lawm thu a sawi bawh a ni.

He Khawthlang Tuipui chungah lei dawh hi ram venhimna atana a tangkai tur thute, ramri bula cheng mipui te tana a tangkai tur thu te sawiin sorkar laipui hian ram bung hnufualte pawh a ngaihthah lo tih hei hian a tih lan thu a sawi bawh a ni.



LPG/POL

West Asia indona thleng mek avanga ei rawngbawlna gas (LPG) leh tuialhthei a harsatna thleng thei lakah Mizoram Sawrkar chuan ngawrh takin hma a la reng an ti.

Food, Civil Supplies & Consumer Affairs department thuchhuah tarlan danin Tun dinhmuna LPG leh tuialhthei (POL) te hi a thleng tha a, mipui tan chia-na tur a awm lo niin an sawi a. Ningani khan chung tin hman tur eirawngbawlna gas chu distributor-te'n cylinder 15,656 an kawh mek a, cylinder 24,201 kalkawngah a thang mek bawh a, cylinder 39,857 awma ngaih a ni a. Sumdawnna atana hmangte ta tur pawh cylinder 610 awm mek a ngaih a ni a. Ningani vek khan petrol hi kilolitre 1,860 leh litre 90 awmin diesel pawh kilolitre 2,142 leh litre 30 a awm a ni.

Lunglei district Police te chuan an thudawn bawhzuiin Ningani zan zanlai leh nimin tuk lam khan Jedaz Petrol Pump, Lunglei Zotlang atangin dan lova tuialhtheih hralh lai an man a, thubuai siam sak an ni. Police te an thlen lai hian truck 3-a barrel rawng pawl ah barrel 39 leh a chanve, a vaiin litre 7,620 chu an thun hman a ni. He mi chungchangah hian Police te chuan tuialhthei leitu mi 3 leh filling station a thawk mi 3 te chu thubuai an siamsak a ni. Filling station a thawk te hian tuialhthei hralhna rate lanna meter chu puanin an khuh bakah lehkha khawng te'n an lo char a, hei hi Police te chuan an hlihthlak sak a ni.

Lunglei District Magistrate khapna bawhchhiaa Jedaz Filling Stationa Tuialhthei Barrel pawla load lai hi man a nih thu Police lam chuan an sawi a. Tuialhthei hi Myanmar lama thawn tur a nih thu a leitu ten an pha lo niin an sawi.

March ni 28 khan Chief Secretary chuan district tina bawrsapte chu an district theuh a eirawngbawlina gas leh tuialthei dah khawl zat leh sem chhuah dan uluk taka vil a, chhek ruk (hoarding), man to zawka hralh (black marketing) leh phalna lova lak pen a nih loh na'na hma la turin a hrih a. District thuneitute chuan dan bawhchhia an awm a nih chuan Essential Commodities Act, 1955 hmangin an lakah hremna khauh tak an lekkawh tur a ni ti a thuchhuah a siam angin bawrsapte chuan khapna an lo chhuah tawh a ni.

<><><>

CENTRAL YMA

Central YMA hnuai Ruihhlo Do Pawl, Central Anti Drugs Squad (CADS) chuan kar hmasa chung khan ruihhlo thahnem tak an man.

Central YMA hnuai Ruihhlo Do Pawl, Central Anti Drugs Squad hian Heroin hawng 13 manin tictac 53 an man tel a, codaine 33 bakah Tramadol tablet 26 leh AP tablet 900 an man tel a, heng ruihhlo man kaihnawih ah hian mihring 35 man telin Excise and Narcotics Department kutah mi 2 hlan an ni.

<><><>

HEROIN HAUL

Excise & Narcotics Department chuan Heroin thahnem tak an man.

Excise & Narcotics Department chuan Nilaini chawhnu dar 2 khan Kolasib Khuangpuilam-ah heroin Kg 1 & gram 252 leh a neitu nia puh mi pahnih – Patrick Ramhmingthang (44) Mualvaiphei, Manipur leh Samson Lalremruat (24) Parbung, Manipur ni a inchhalte an man a, Heng Heroin te hi Manipur atanga an lak, Silchar lama hralh tum mek lai a ni.

Heroin vanga mante hi Narcotic Drugs & Psychotropic Substances Act, 1985 (NDPS Act) section 21(c) hmangin thubuai siamsak an ni a, District & Sessions Court, Kolasib-ah hruai nghal an ni.

Excise & narcotics hotute chuan Narcotics Control Bureau (NCB) chuan heroin kg khat hi cheng nuai 80 hu niin India rama tun dinhmunah rate a siam a. Mizoramah hian tun dinhmunah heroin hawng khat (gram 12 vel) hi Rs. 35,000 leh Rs 40,000 vel hu ni a ngaih a nih thu an sawi bawk a ni.

<><><>

LUNGLEI WEST MLA

Lunglei West bialtu MLA Pu T. Lalhlimpuia chuan Lunglei khawpui chhung veng hrang hrang fang kualin, khawpui chhunga tuihawk kawng bo tam tak avanga harsatna awm thin leh a siam that theih dan tur a enfiah.

Pu T. Lalhlimpuia chuan Lunglei khawpui chhung hmun hrang hranga tuihawk kawng bo tam tak chu tuiluankawra luan luhtir turin chak taka hma lak a har dawn tih sawiin, tuiluankawr hnawhtu siam that theih lai lai chu a rang lama siam tum a nih thu a sawi a. Tuiluankawrah PHED connection pipe eng emaw zat a awm bawk avangin a siam that kawngah pawh PHE Department te nen inthurala hma lak a tul dawn tih a sawi a. Lunglei khawpui chhunga tuiluankawrte chu awmze nei leh tha zawka siam that vek a ngai tih sawiin, tuiluankawr tha tak siam turin Department hrang hrang nen tang rualin project lian zawk ruahman ni se tha a tih thu a sawi.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



ASF

Kumin chhungin African Swine Fever (ASF) vawk pulhri natna leng avangin Mizoramah vawk 151 a thi leh tawh.

Animal Husbandry & Veterinary department hotute sawi danin kumin January thla bul atanga Ningani thleng khan ASF vawk pulhri leng avangin vawk 151 thi tawhin vawk pulhri darh zel tur venna atan vawk 39 suat a ni tawh bawk. Vawk pulhri leng avang hian Serchhip district-ah leh Aizawl district-ah vawk thi report leh vawk suat a awm a. Serchhip district-ah chuan khawpui chhung – Chanmari veng, P&E veng leh Kawnpui North vengah a leng a, Aizawlah chuan Durtlang Leitan Ramthar leh Durtlang Suaka Vengah te a leng a ni. Serchhipah hian vawk 144 a thi tawh a, Durtlangah hian vawk 7 a thi tawh a. Vawk suat 39-te hi Serchhip district ami vek a ni a, Durtlang veng 2-ah chuan suat a la awm lo a ni. Nilaini khan Serchhipah hian P&E veng leh Kawnpui North-ah vawk 12 ve ve, a vaiin 24 a thi a. Ningani khan Serchhip district Kawnpui North-ah vawk 12 thi-in P&E vengah vawk 6 a thi leh bawk a. ASF vawk pulhri leng hi Serchhip khawpui leh Aizawl khawpui veng panga a chhungkaw 40-in an tuar tawh a, Serchhip khawpui veng 3 a chhungkaw 38 leh Durtlang veng pahnih a chhungkaw 2 te an ni.

Vety department hotute chuan kumina ASF vawk pulhri leng hi state pawn atanga vawk lakluh vang a ni tih finfiahna a awm lo tih an sawi a. Kum 2021 March ni 21 a Lungsen khua a ASF hri avanga vawk thi hmuhchhuah a nih atang khan tun thlengin kumtin he vawk pulhri hi Mizoramah a la leng chho ta ziah a. ASF vawk pulhri hian

Mizoram hi a chen chilh chho ve tawh hrim hrim a an ngaih thu leh kum tin, kum tir lam ruah tlak hnu a khaw ro chho leh lum chho zelah a darh nasa duh thin ni a an hriat thu an sawi a ni.



ELECTION CAMPAIGN

Assam, Puducherry, Keralam, Tamil Nadu leh West Bengal Assembly inthlan campaign in a vanglai a thleng chho mek a. Prime Minister leh senior BJP leader Narendra Modia chuan nimin khan Puducherry ah NDA candidate te tan kawngzawh a huaihawt a. Km 1.2 a thui kawngzawh neih niin minute 35 chhung hun hman a ni a. Ajanta Signal junction atangin Raja Theatre signal inkar an kal a ni . He hunah hian Prime Minister Modia hi Chief Minister N. Rangasamy, BJP State President V.P. Ramalingam, Home Minister A. Namassivayam ten an tawiawm a ni. Hemi hnu hian PM Modia hian Tamil Nadu lam a pan leh nghal a. Vawiinah Keralam ah hun a hmang bawk a ang

Hetihlai hian Union Home Minister leh BJP senior leader Amit Shah-a chuan Assam-a Goalpara district-a Dudhnoi ah vantlang inkhawmah thu a sawi a.

Congress leader leh Lok Sabha Leader of Oppostion Rahul Gandhi chuan vawiin Keralama Alappuzhaah campaign programme a nei dawn a. Hei bakah hian Kattappana leh Kunnathunad ah hun a hmang bawk ang.



LPG

Indian Oil chaun ramchhungah LPG supply tluang takin intinah kalpui mek a ni a ti a. Nitin LPG cylinder hi nuai 28 chuang semchhuah anih thu Indian Oil hotute chuan an sawi a. Hei hi khawvel hmundanga indona a thlen hma ami nen a danglam lo niin an sawi bawk a ni. Indian Oil company hotute chuan mipuite digital mode hmang tangkai turin a chah a. SMS leh IVRS booking system hmang tangkai turin a ngen a ni.

